

乾隆大藏經



乾隆大藏經



第二〇册 大乘經 五大部（三）

方廣大莊嚴經	一二卷	亦名：神通遊戲	唐中天竺國沙門地婆訶羅奉詔譯	一
普曜經	八卷		西晉三藏法師竺法護譯	二一一
佉真陀羅所問寶如來三昧經	三卷		後漢月支三藏法師支婁迦識譯	三五一
大樹緊那羅王所問經	四卷		姚秦三藏法師鳩摩羅什譯	四〇九
諸法本無經	三卷		隋天竺三藏法師闍那崛多譯	四七三
諸法無行經	二卷		姚秦三藏法師鳩摩羅什譯	五一一
持人菩薩所問經	四卷		西晉三藏法師竺法護譯	五四三
持世經	四卷	亦名：佛說法印品經	姚秦三藏法師鳩摩羅什譯	五九五
佛說大灌頂神咒經	一二卷		東晉西域三藏帛尸梨蜜多羅譯	六六九
佛說文殊師利現寶藏經	二卷		西晉三藏法師竺法護譯	七八三
大方廣寶篋經	二卷		劉宋天竺三藏法師求那跋陀羅譯	八二五
佛說藥師如來本願經	一卷		隋天竺三藏法師達磨笈多譯	八六七
藥師琉璃光如來本願功德經	一卷		唐三藏法師玄奘奉詔譯	八八一
藥師琉璃光七佛本願功德經	二卷		唐三藏法師義淨奉詔譯	八九三

番字藥師七佛本願功德經 一卷

佛說阿闍世王經 二卷

楞伽阿跋多羅寶經 四卷

入楞伽經 一〇卷

唐三藏法師義淨奉詔譯……………九二一

後漢月支三藏法師支婁迦識譯……………九五—

宋天竺三藏求那跋陀羅譯……………一〇〇三

元魏天竺三藏法師菩提留支譯……………一〇九五

方廣大莊嚴經

唐中天竺國沙門地婆訶羅奉詔譯



清刻龍藏佛說法變相圖

方廣大莊嚴經序

唐 武 則 天 製

朕聞真空無象非象教無以譯其真實際無
言非言緒無以詮其實是以龍宮法鏡圓照
帀於三千驚嶺玄門方廣周於百億師無師
之智必藉修多學無學之宗終資祇夜自金
人感夢寶偈方傳貝葉靈文北天之訓逾遠
貫華微旨西秦之譯更新大乘小乘追根機
而演教半字滿字逐權實而相曉廠唐之御
寓載叶昌期代傳三聖年將七十舜河與定
水俱清堯燭與慈燈並照緇衣西上寧惟法
顯之流白馬東來豈直摩騰之輩大弘釋教
諒屬茲辰朕爰自幼齡歸心彼岸務廣三明
之路思崇八正之門往者夙邁閔凶遽違嚴
蔭近以孝誠無感復背慈顏露草之恨日深

風樹之悲鎮切凡是二親之所蓄用兩京之所舊居莫不總結招提之宇咸充無盡之藏仍集京城大德等凡有十人共中天竺國三藏法師地婆訶羅於西太原寺同譯經論法師等並業隣初地道駕彌天爲佛法之棟梁乃慧海之舟楫前後翻譯凡有十部以垂拱元年歲次大梁月詠夷則汗青方就裝縹畢功甘露之旨既深大雲之喻方遠庶永垂沙劫廣濟塵區傳火之義自明寫瓶之辯逾潤朕以虛昧欽承顧託常願紹隆三寶安大寶之鴻基發揮八聖固先聖之丕業所以四句微言極提河之深致一音妙義盡菴園之奧旨擊大法鼓響振於無間吹大法螺聲通於有頂爲閭室之明炬實昏衢之慧月菩提了義其在茲乎部帙條流列之於後

方廣大莊嚴經卷第一

亦名神通遊戲

唐中天竺國沙門地婆訶羅奉詔譯

序品第一

如是我聞一時佛在舍衛國祇樹給孤獨園與大比丘衆萬二千人俱皆是大阿羅漢其名曰阿若憍陳如摩訶迦葉舍利弗摩訶目乾連摩訶迦旃延富樓那彌多羅尼子摩訶男阿菟樓駄劫賓那跋提羅優波離難陀娑伽陀阿難羅睺羅如是衆所知識大阿羅漢等菩薩摩訶薩三萬二千人皆是一生補處遊戲神通三昧自在大願滿足入無礙慧獲諸法忍具陀羅尼辯才無滯一切皆從波羅蜜生已能圓滿菩薩諸地已得一切菩薩自在其名曰彌勒菩薩陀羅尼自在菩薩師子王菩薩成就義菩薩寂滅慧菩薩常精進菩薩

薩無礙慧菩薩大悲思惟菩薩與如是等菩薩衆俱爾時世尊爲諸四衆比丘比丘尼優婆塞優婆夷國王王子大臣官屬刹利婆羅門長者居士及諸外道無央數衆常以四事恭敬施安於供養中最爲殊勝佛心無染猶如蓮華不著於水名稱高遠遍於十方所謂如來應供正遍知明行足善逝世間解無上士調御丈夫天人師佛世尊成就五眼具足六通於此世間及餘國土爲諸天人演說正法初中後善其義深遠其言巧妙純一圓滿具足清白梵行之相爾時如來於中夜分入佛莊嚴三昧從於頂髻放大光明其光名爲憶念過去諸佛無著智上照淨居天宮爲欲開發諸天子故光明網中而說偈言

牟尼身口意清淨 智慧光明照世間

此光最勝除冥暗 於釋師子應歸命
智慧大海勝威德 知法自在爲法王
世間應供天中天 覺悟自在應歸命
所有難調心已調 意淨超出諸魔網
其所見聞不空過 解脫彼岸應歸命
佛無體性無與等 所作無邊常寂然
知淨妙理除疑惑 一切深信應歸命
施甘露藥大醫王 辯才雄猛摧邪道
法爲眷屬知勝義 導師演說無上法
爾時淨居天子聞如是偈從禪定起即時憶
念過去無量無邊阿僧祇劫諸佛如來及佛
國土功德莊嚴說法衆會皆悉明了時摩醯
首羅難陀蘇難陀等無數淨居天衆光明赫
奕威神巍巍照祇樹給孤獨園來詣佛所頂
禮佛足一心合掌恭敬而立白佛言世尊有

經名爲方廣神通遊戲大莊嚴法門顯示菩
薩衆德之本處於兜率微妙天宮思惟降生
示現勝種具諸功德行童子事藝業技術工
巧書筭擗力騁武而於世間皆悉最勝示受
五欲具菩薩道降伏魔軍出生如來力無畏
等一切佛法此經如是過去無量諸佛世尊
皆已宣說所謂波頭摩勝佛法幢佛爲照明
佛功德幢佛功德性佛大性佛仙天佛勝光
明佛眞幢佛金剛堅固佛降伏一切佛眞金
色佛極高行佛珊瑚海佛華幢佛最勝色佛
善眼佛仙護佛勝輪佛高勝佛開敷蓮華佛
眉間光明佛蓮華臺佛善光明佛吉祥佛善
見佛師子光佛堅牢惠施佛香春佛廣大名
稱佛底沙佛弗沙佛世間端嚴佛普光明佛
寶稱佛最勝光明佛梵光佛善聲佛妙華佛

美音佛上色行佛微笑目佛功德聚佛大雲
聲佛善色佛壽光佛象王遊步佛世間欣樂
佛降伏魔怨佛正應供佛毗婆尸佛尸棄佛
毗葉浮佛迦羅孫佛俱那含牟尼佛迦葉佛
如是等過去無量諸佛如來皆說此經惟願
世尊還如過去諸佛利益安樂無量衆生悲
愍世間令得義利令諸天人於大衆中而得
增益降伏異道摧滅魔怨顯發菩薩所行功
德而於上乘勸勉精進攝受正法紹三寶種
使不斷絕示現成佛事業圓滿故亦說是經
如來爾時哀愍諸天默然受請是時諸天蒙
佛垂許歡喜踊躍生清淨心稽首作禮右遶
三帛散天曼陀羅華供養於佛忽然不現爾
時世尊於晨朝時詣迦羅道場敷座而坐諸
大菩薩及聲聞衆恭敬圍遶告諸比丘昨於

中夜摩醯首羅及難陀蘇難陀等無數淨居
天衆稽首我足合掌恭敬而白我言惟願如
來演說神通遊戲大莊嚴經典憐愍一切世
間天人令諸菩薩現在未來而得增益我時
默然可其所請汝等諦聽我今宣說

毘率天宮品第二

爾時佛告諸比丘何等名爲方廣神通遊戲
大莊嚴經典所謂顯於菩薩住毘率宮常爲
無量威德諸天之所供養逮得灌頂百千梵
衆之所稱揚願力圓滿能正了知諸佛法藏
慧眼清淨其心普洽慚愧知足正念慧行熾
然修行布施持戒忍辱精進禪定智慧方便
善巧勝波羅蜜大慈大悲大喜大捨梵行明
達得大神通知見現前無著無礙念處正勤
神足根力覺支正道菩提分法皆盡邊際具

足相好莊嚴其身利益衆生無時暫替如說而作無虛妄語演說正法無所貪求心淨質直離諸邪諂無有怖畏亦無憍慢於一切衆生其心平等供養無量百千萬億諸佛如來恒爲無量百千那由他諸大菩薩恭敬尊重又爲梵釋四王摩醯首羅天龍夜叉乾闥婆阿脩羅迦樓羅緊那羅摩睺羅伽等聞名稱讚生歡喜心入無礙解方便善巧一切文句差別之相皆悉能知凡有宣說曾無所著如大商主乘大法船遊生死海得三十七菩提之分無量珍寶而於佛法得陀羅尼憶念修行終不錯謬如大導師越四瀑流誓願滿足降伏魔怨摧諸異學以金剛慧及大悲軍能破煩惱譬如蓮華出於功德廣大池中增上願力之所生起大菩提心而爲其根潤以甚

深清淨法水方便善巧以爲其臺菩提爲莖禪定爲藥離諸熱惱清淨廣大以爲其葉多聞持戒及不放逸無所罣礙以爲其香非世人法之所能染如師子王福智爲體神通爲足聖諦爲爪梵住爲牙四攝爲頭覺十二緣以生其軀三十七品菩提分法明了之智以爲其頂三解脱門以爲嚔呻禪定智慧以爲其目以諸三昧爲其巖穴毗柰耶林四威儀路怡悅其身十力四無所畏慣習所成而爲其力離諸貪欲爲其行步自在無畏無我無法以爲其吼摧伏外道如制群鹿無上丈夫人中之日禪定解脱智慧爲光外道螢燭皆悉掩蔽無明昏翳破之無餘於天人中廓然大照譬如明月白分圓滿世間樂見清涼無雲衆星之中皎然最勝示解脱路照菩提道

開敷天人拘物頭華譬如輪王於四天下法
化平等七菩提分以爲其實於一切衆生心
行平等以爲十善大願成就無礙之法以爲
其輪譬如巨海深廣難入無量衆寶充滿其
中潮不過限緣起智慧深廣難入一切法寶
充滿其中應衆生機爲不過限其心平等離
諸憎愛如地水火風其量高妙堅固難動如
須彌山智慧廣大不爲諸垢之所染著猶如
虛空意樂清淨能行惠施久積淨業無虛妄
語已能具足一切善根自在熏修七阿僧祇
所習善根皆已迴向弘五福德施七淨財行
十善道增長五十二種善根已能修習正行
相應四十分位已能修習誓願相應四十分
位已能修習意樂相應四十分位已能修習
正直解脫四十分位曾於四百億那由他拘

胝佛所隨佛出家曾於五十百億那由他拘
胝佛所而行大施已曾親近三百五十拘胝
諸辟支佛已曾教化無量阿僧祇諸聲聞衆
皆令住於正方便中爲欲證阿耨多羅三藐
三菩提及趣一生補處從此命終生兜率天
爲彼天子名曰淨幢恒爲諸天之所供養當
於彼沒復生人中證阿耨多羅三藐三菩提
佛告諸比丘彼天宮中有三萬二千微妙安
樂所住之處高閣重門層樓大殿軒檻窻牖
華蓋繒幡寶鈴垂飾珠網交絡散以曼陀羅
華摩訶曼陀羅華處處盈滿諸天姝女百千
拘胝那由他奏天妓樂其諸寶樹生衆天華
所謂阿提目多華俱毗羅華詹波迦華波吒
羅華目真隣陀華阿輸迦華鎖頭迦華阿娑
那華建尼迦華堅固華大堅固華處處開敷

以爲嚴飾真金線網彌覆其上周帀間廁種種莊嚴諸寶池中生摩利迦華蘇曼那華跋羅華婆利師迦華拘旦羅華蘇建提華天妙意華優鉢羅華波頭摩華拘物頭華芬陀利華妙香華如是等華成大華帳處處莊嚴無量羽族鸚鵡舍利拘枳羅鳥鵝鴈鴛鴦孔雀翡翠迦陵頻伽命命等鳥雜類形色出微妙音諸天子等百千拘胝那由他數大集法堂圍遶菩薩聽受所說無上大法除斷貪瞋慢結使一切煩惱生廣大心踊躍歡喜住安隱樂菩薩久修淨業所感諸天妓樂八萬四千皆出種種微妙音聲其音聲中而說頌曰尊憶然燈記 積集無邊福 超越於生死智慧發光明 長時修惠施 其心常離染三垢憍慢盡 語業無諸過 憶昔無邊劫

種姓恒處尊 戒忍及精進 定慧久修習 又念無邊劫 供養諸如來 既超生老死 當度所應度 衆生可悲愍 惟尊勿捨之 諸天龍鬼神 皆悉共瞻待 衆生久渴欲 如海納羣流 惟尊智充足 當救諸渴者 速於世譏嫌 樂法捨貪欲 離垢清淨眼 哀愍諸世間 菩薩宿福德 處於兜率宮 天衆百千億 聞法曾無倦 當下閻浮提 垂慈灑甘露 已過於欲界 無數億諸天 亦復共希望 菩薩當下生 必壞於魔業 能摧諸異學 佛道如觀掌 至時宜勿住 煩惱火增盛 願爲布慈雲 普雨於法雨 滅除諸猛燄 前佛已過去 今佛作賢王 當以三脫門 爲藥除衆病 令彼諸含識 得至於涅槃 如來大法音 外道悉摧伏

譬如師子吼 百獸咸驚怖 智慧以爲手
從於精進生 無量諸魔軍 自在能摧伏
梵釋百千數 敬心祈見佛 四王當奉鉢
惟希速下生 尊今應豫觀 欲依何種族
當往閻浮界 示行菩薩道 如器盛珍寶
其器自嚴潔 智慧淨摩尼 於彼雨甘露
諸天樂器中 演出如是偈 勸請於菩薩
大悲救衆生

勝族品第三

佛告諸比丘爾時菩薩聞如是偈即從座起
出於自宮詣法集堂坐師子座復有無量無
邊同乘同行大菩薩衆皆昇法堂坐師子座
各有六十八拘胝眷屬前後圍遶菩薩將欲
降生十二年前有淨居天下閻浮地作婆羅
門說圍陀論彼論所載十二年後有一勝人

現白象形入於母胎其人具足三十二種大
人之相有二決定若在家者當爲轉輪聖王
若出家者當得成佛復有天子下閻浮提告
辟支佛作如是言仁者應捨此土何以故十
二年後當有菩薩降神入胎是時王舍城尾
盤山中有辟支佛名曰摩燈聞是語已自見
其身猶如委土從座而起踊在虛空高七多
羅樹化火焚身入於涅槃惟餘舍利從空而
下是故此地名仙人墮處諸比丘是時波羅
柰國五百辟支聞天語已亦復如是化火焚
身入於涅槃惟餘舍利從空而下復以過去
有仁慈王施於羣鹿無畏之處是故彼地亦
名仙人鹿苑爾時菩薩處於天宮以四種心
而徧觀察一者觀時二者觀方三者觀國四
者觀族比丘何故觀時菩薩不於劫初而入

母胎惟於劫滅世間衆生明了知有老病死苦菩薩是時方入母胎何故觀方菩薩不於東弗婆提西瞿耶尼北鬱單越及餘邊地惟現閻浮所以者何閻浮提人有智慧故何故觀國菩薩不生邊地以其邊地人多頑鈍無有根器猶如啞羊而不能知善與不善言說之義是故菩薩但生中國何故觀族菩薩不生旃陀羅毗舍首陀家四姓之中惟於二族刹帝利種及婆羅門於今世間重刹帝利是故菩薩生刹利家如是觀已默然而住爾時會中諸菩薩衆及諸天子各相謂言菩薩今者當於何國依何種姓而託生耶或有天言摩伽陀國毗提訶王豪貴甚盛可生於彼復有說言菩薩不生於彼何以故其王父母俱不真正驕慢卒暴善根微眇無大福德不宜

生彼或有天言憍薩羅王種望殊勝多有財寶象馬車乘吏民僮僕可生於彼復有說言菩薩不生於彼何以故其王本是摩燈伽種父母宗親悉皆鄙劣少信薄福不宜生彼或有天言彼犢子王種姓豪強富樂熾盛好行惠施可生於彼復有說言菩薩不生於彼何以故其王凡劣無大威德暴戾可畏母族卑下篡竊居位不宜生彼或有天言毗耶離王尊貴富盛安隱快樂無諸怨敵人民衆多宮室苑園林泉華果莊嚴綺麗猶若天宮可生於彼復有說言菩薩不生於彼何以故其國土中諸離車子不相敬順各自稱尊是故菩薩不宜生彼或有天言勝光王有大威力統御兵衆能破怨敵可生於彼復有說言菩薩不生於彼何以故其王剛強不修善業是故

菩薩不宜生彼或有天言摩偷羅城王名善臂勇猛安樂富貴自在可生於彼復有說言菩薩不生於彼何以故其王本是邪見種族殘害無道不宜生彼或有天言般荼婆王都在象城勤事勇健支體圓滿人相具足能制怨敵可生於彼復有說言菩薩不生於彼何以故其王閹宦之人室家壞亂雖有五男皆非其胤不宜生彼或有天言彌梯羅城莊嚴綺麗王名善友威伏諸王象馬四兵皆悉具足珍寶無量樂聞正法可生於彼復有說言菩薩不生於彼何以故其王雖有如是美事年時衰暮無有力勢復多子息不宜生彼佛告諸比丘無量菩薩及諸天子於閻浮提十六大國所有威德勝望王種周徧觀察皆悉不堪菩薩往生相與籌議竟不能知菩薩生

處爾時會中有一天子名曰智幢善入大乘心不退轉告衆天子言汝等宜應往問菩薩當生何處諸天子等咸共合掌詣菩薩所而前問言閻浮提中何等種姓具何功德補處菩薩當生其家爾時菩薩告諸天子閻浮提中若有勝望種族成就六十四種功德者最後身菩薩當生其家何等名爲六十四德一者國土寬廣種姓真正二者衆所宗仰三者不生雜姓四者人相端嚴五者族類圓滿六者內外無嫌七者心無下劣八者二族高貴九者二族可敬十者二族有望十一者二族有德十二者其家多男十三者所生無畏十四者無有瑕疵十五者貪愛微薄十六者遵奉禁戒十七者皆有智慧十八者凡是所用要令羣下先觀試之十九者人皆工巧二十

者與朋友善終始如一二十一者不害衆生
二十二者不忘恩義二十三者知行儀式二
十四者依教行事二十五者疑即無成二十
六者不愚於業二十七者不吝於物二十八
者不作罪惡二十九者功不唐捐三十者施
心殷重三十一者志性決定三十二者善於
取捨三十三者於施信樂三十四者丈夫作
用三十五者所爲成辦三十六者勤勇自在
三十七者勇猛增上三十八者供養仙人三
十九者供養諸天四十者供養論師四十一
者供養先靈四十二者常無怨恨四十三者
名振十方四十四者有大眷屬四十五者不
沮善友四十六者有多眷屬四十七者有強
眷屬四十八者無亂眷屬四十九者威德自
在五十者孝順父母五十一者敬事沙門五

十二者尊婆羅門五十三者七珍具足五十
四者五穀充盈五十五者象馬無數五十六
者多諸僕從五十七者不爲他侵五十八者
所作成就五十九者轉輪王種六十者宿世
善根而爲資糧六十一者其家一切所有皆
由菩薩善根增長六十二者無諸過失六十
三者無諸譏嫌六十四者家法和順如是名
爲六十四德若有成就如上功德補處菩薩
當生其家若有女人成就三十二種功德當
爲菩薩之母何等名爲三十二德一者名稱
高遠二者衆所咨嗟三者威儀無失四者諸
相具足五者種姓高貴六者端正絕倫七者
名德相稱八者不長不短不麤不細九者未
曾孕育十者性戒成就十一者心無執著十
二者顏色和悅十三者運動順右十四者識